

F Lies mithilfe des Glossars den Text und löse die Aufgaben dazu.

Far capuns e valurs perpetnas

Claudia Cadruvi Pfeiffer

En nossa famiglia ein ils capuns enzatgei sco in'ierta sontga. Autras famiglias possedan bischutaria ch'ellas dattan d'ina generaziun a l'autra. Ni casas, castials, mises e sulom. En nossa famiglia dat ei nuot da quei. Ei dat persuerter capuns. Mia basatta ha mussau a mia tatta da far capuns. Lezza ha mussau a mia mumma e quella puspei a mi. Duront manizzar il peterschin ed il por per ils capuns freda ei en cuschina. Igl ei in fried frestg che semischeida cul gust salau dils langeghers e dalla carnpiertg. L'odur regorda mei al temps ch'jeu gidavel la mumma a manizzar jarvas e carn. Mia mumma raquintava lu adina co ella fageva capuns cun sia mumma. «Nus vevan buc aschi buna carn da metter ella pasta. Sche tia tatta vesess tgei carn ch'ins metta oz els capuns, sedesperass ella. Ella metteva magari en in ur rontsch dalla carnpiertg. Oz dess ins quei gnanc als pors. Capuns era ina spisa da paupers.» Aschia raquintava mia mumma. Jeu empruavel da s'imaginar co ils capuns da mia tatta gustavan. Jeu vevel respect dil temps dils capuns cun carn rontscha. Oz sun jeu mumma. Mias feglias gidan a manizzar ed jeu raquentel da pli baul. «Sch'jeu gidavel a manizzar, stueva il peterschin esser melli gadas pli fins che quei che nus manizzein oz. Era ils quadrels da carnpiertg stuevan esser pli manedels. Sch'els eran buc pigns avunda, fageva mia mumma da narr ed jeu stuevel aunc ina gada tagliar permiez mintga toc.» Mias feglias creian tut – era sch'igl ei aschi surfatg ch'igl ei strusch pli ver. Jeu ditgel: «Sche vossa tatta vesess che nus manizzein schizun timian e salvgia els capuns, sedesperass ella. Vus astgeis mai raquintar quei ad ella, schiglioc survegn ella in'attacca!» Mias feglias fan egls gross. Duront barsar giu ils capuns sun jeu persula. Mes patratgs sgolan ella cuschina da mia mumma e tier mia tatta che zugliava buc en ils capuns, mobein scheva buglir els sco bizochels. E co vegn ei ad esser in di ellas cuschinas da mias feglias? Tgei ingredienzas vegnan ellas a manizzar els capuns e tgei historias vegnan ellas a raquintar da mei a lur buobas? Probabel praulas tut che schula. Mo quei emporta nuot. Basta ch'ei dat capuns. Basta ch'ei dat historias da mmmas, tattas e basattas. Basta ch'ei dat valurs perpetnas.

l'ierta	das Erbe
nuot	nichts
il por	der Lauch
ferdar, ei freda	riechen
sedesperar	verzweifeln
pauper, paupra	arm
rontsch, rontscha	ranzig
la valur	der Wert

a) Tgei ingredienzas drova ei per cuschinar capuns? Numna silmeins tschun.

b) Tgei recept has ti empriu da tia mumma, tgeinin da tia tatta ni basatta?

c) Tgei cuschinas ti il pli bugen en famiglia cun tes affons ni fargliuns?

d) Explichescha il plaid da sligiazion dalla cruschera (exercezi digital, Anflas ti il plaid da sligiazion?). Tgei ha el da far culs capuns?

e) Tgi cuschina ils megliers capuns? Explichescha pertgei che quei ei aschia.
